



ESTD. MARCH 2008
MAY 2026

Hinna Vâk

AN ORGAN OF THE TANGPAI PRESBYTERIAN CHURCH



GAM THIM SALVAK DING IN

- Thagau thiangtho hungna
- Mizosia mamaw chanchinpha



EDITORIAL | SERMON | KOCHUAM HUANG | REPORTS | SÔNNA ETC.

To,

If undelivered please return to - TPC Office,
P.O. Box - 107
D. Phailian,
Churachandpur - 795128
Manipur, India

Editor : Rev. Kamkhotinthang Neihzial,
Executive Secretary

Joint Editors : Rev. C. Lalremruata, Consultant
: Rev. Luttinlel
: Rev. Khaisonhang Vaiphei
: Upa Thualkholian
: Upa Nengsuanhang
: Pi Neikhovak, General Secretary, CKNP
: T.Upa Thangginlun, General Secretary, CKKP

Business Manager : Tual Upa Langlalthamuan
TPC Office D. Phailian
P.O. Box 107 Churachandpur-795128
Phone No. +91 9958160325
Email - ehinnavak@gmail.com

Kum khat lak man : Rs. 150.00

A man penuam leh a la thak nuamte'n Business Manager kiang ah hiatsak di.

A SUNG AH THU UMTE

1. Editorial	01
2. Kochuam Huang	02
3. Gamthim salvak ding in	03
4. Jesu Khrista zuitu ginum	08
5. Ei ko in	11
6. La dinmun	13
7. Mihing hin ziak	18
8. Thagau thiangtho hungna	20
9. Mizosia mamaw chanchinpha	24
10. Vâk chate gual in um un	28
11. Numeite leh Pathian nasepna	32
12. 46th PCI Biennial General Assembly report	35
13. KKP huang	36

SYNOD PUIPATE

Moderator	:	Rev. S Lama Vaiphei
Secretaries	:	Rev. Summinlian Vaiphei (Sr.) Rev. Lalpiaklian (Jr.)
Finance Officer	:	Upa Tinliankham
Statistician	:	Rev. Andrew LR Khiangte
Executive Secretary	:	Rev. Kamkhotinthang Neihzial
Consultant	:	Rev. C. Lalremruata

Hinna Vâk ah thu kisuate zosia hi Editor ngaidan a hi vek puai



Pauchapna Thupi:

1. Bial Kikhawmpi lawting tak ah i mat thei ziak un kipakthu gen hitiu. Leilon Pastor Bial inle lawting tak ah a mat theina ding un pauchappi hitiu.
2. Kochuam Ni pawimaw (Penticost) Kochuamte'n Taksa leh Thagau ah malsawmna tamtak tawh i mat chiat theina ding un pauchap hitiu.
3. Missionary mun chuam chuam ah um te â ding in pauchap hitiu.
4. Rostad Memorial High School ah Zillaite leh Zilsaktu zosiate â ding in pauchap hitiu.
5. Gamsung buaina ziak ah panlatu pawl chuam chuam ah puitute â ding in pauchap hitiu.

CHANCHINPHA HUN TUNTUTE KENG CHU A MÊLPHA NALAWM LAWME!

Hinna Vâk Simtu dawitak zosiate dawisakna ka hun lân hi.

Khawvel in kengtawdap mantam but ah stage chung ah chia vel vel, model-te kêng mêlpha a sa. Himaleh, van-gam mudân ah kêng mêlpha chu a chuam a hi. Rom 10:15 chun, “*Chanchinpha hun tuntute kêng chu a mêlpha nalawm lawm e!*” a ti. Kêng chu chiana a hi. Chanchinpha chu chutpi di hilo in, puak ah, kalsuanpi di a hi. Bangziak ah kêng mêlpha a hi diam?

- 1. A chiana mun ziak ah mêlpha a hi.** Kêng mêlpha in munthim a lut ngam hi. Damdawi In, Suangkul Inte, Inkuan kikhente, khamthei bawlte, etc te kiang tiang in. Jesu kha kêng in Samari numei khat â dĩn a chia ah, Kraws chan in ei uh a dĩn a chia hi. Tuni’n la kêng kha khawilam zuan in a chia em? Ki-enchian thak in. Kêng mêlpha chu a chiana mun zil a hi.
- 2. A thil puak ziak in a mêlpha a hi.** Kêng mêlpha in gensiatna, lauthawwna, thu phalo a paw puai. Chanchinpha bep a pua a hi. Zia chu, “Khrist chu la gitlo ziak in a thi, a thokit ah, ngaidam in la um ta a hi.” Romte 10:14na chun, “Thugen a umlo leh bangt’in a la hethei di a hui em?” a ti. Kêng a chialo leh thu kihe theilo di. Thu a hetlo uh leh kuamăn gingchalo di a hui.
- 3. A sawlpa ziak in mêlpha a hi.** Sawl a hilo ua leh bangt’in thu gen thei di a hui em?“ Sawl ah um ding in Pastor hi khel a kûl pua, Bible College ah kai le a kûl puai. Chanchinpha la nei phawt chun, sawl ah um sa la hi tai. La Insung ah, la lawite lak ah, la nasepna mun ah le la WhatsApp group ah.
- 4. Kêng um hiat hiat lau-umdân.** I khut zung in phone hun sawtpi pi i khawi sek ah. Himaleh, i kêng in i vengteu kiang ah Jesu chanchin gen dĩn kawt a kân zolo a hi. Kêngtawdap nal tak tak Pathianni in i but ua, Seppatni apat Kiginni chan hi Chanchinpha

a di'n i kêng uh a mêlpha nă'm? I genlo zia'k un a mangthaite thisan maw i chung un phû't di a hi (Ez 3:18)

Tu'n i kêng chiat uh vak en hitiu. Pathian mitmu in a mêlpha nă'm? Jesu nei nailo mi khat bek i kêng un va chuan hitiu in, Jesu'n a hepi thu va hil hitiu ! Pathian in kam thiam a hawl pua, a kêng ah lam zawt nuamte a hawl zaw a hi. La kêng chiana chu a nê'n in, chawl um in a lau-um maithei. Maleh, Jesu a puak phatleh Lalpă'n "a mêlpha'i" ti di a hi. I kêngteu eimau mêlphatna di bep ah mang ah, Lapa Jesu â dia mang nailo i hi khak uh chun, tuhin kalsuan ngal hitiu. "Tu'n ka kêng nang ka hung pia'i, ei sawl inla ei mang in, nangma ka puak zia'k in ka kêng uh mêlphat sak in" ti thei leuhin nawp a um hi. Hukdampna Chanchinpha pua ah, i kêngteu mêlpha thei ding in simtu zosiate Lalpă'n malzawl chiat ta hen !



Kochuam Huang

Pastor Bial Kikhawmpi

Ni 24-26 April 2026 sung in Pastor Bial Kikhawmpi Pathian kithuapina tawh Bial tamzawte'n malzawl na tamtak dawng in a kimangchai thei ah, kipak a um hi. Dumlian Pastor Bial in Rev. Ph. Thianneilal tawh ni 17-19 April 2026 khan Pastor Bial kikhawmpi a lah mangthei ui. Chuleh, Rev. Genlemthang Suantak i/c Kawlhen Pastor Bial hi damlo kienkaw'ling a hi zia'k in, Office in Kawlhen Pastor Bial kikhawmpi matpi ding in Rev. H. Lamthianmuan a sawl ah, lawk tak in a mangchai thei ui.

Kochuam Ni Pawimaw

May thasung ah Kochuam Ni Pawimaw (Missionary Day, Pentecost Ni) -te hi Kochuamte'n taksa leh thagau ah lawting tak ah i mat chiat thei ding uh i kidawisak ah, Pentecost Ni hi kumsin ah i lah bawl zing gual u'n PCI General Assembly Pauchapgualna thupi mang ah pauchapgualna leh Pentecost Sermon thupi mang ah kikhawpna um ding a hi. Zia hun ah thilpiak kilakhawmte chu NEICC thawlawm a hi dungzui in, Kochuam tinte'n Bial Treasurer haw malam in Office ah piaklut ding a hi kha i hiat chiat uh i kinem hi.

GAMTHIM SALVAK DING IN

-Rev. S. Mangminthang
i/c Kangvai Pastor Bial

A mit uh hivak ding leh, thim lak a kipat vak ah pui lut ding leh, Setan thilhitheina kipat Pathian lam a pui ding leh, a gitlonau ngaidam a hung hiu ah, keima ah um ginna sukthiang a umte tawh golua ding ah pui ding in, ti'n ei hun dawnhu a. (Nasepte16:18)

Zia bible chang hi sawlchak Paul in Leng Agrippa masang ah, a va din hun ah a thu gen a hi. Leng Agrippa hi leng lopi ah kigen Leng Herod tupa a hi. A pa hi Leng Agrippa-I a kitia, ama hi Leng Agrippa- II a lah kiti sek a hi. Sawlchak paul hi a pianthak masang chun gingtute dodaltu leh sugentheitu khat a pang zing himaleh a hung pianthak zaw nung ah Lalpa'n judate leh gentelte kiang ah hukdamna chanchinpha gen ding ah Lalpa'n a sawl a hi dingzui ah sem a hidan thu Leng Agrippa-II ma-ang ah hangsan tak ah a genna thu

a hi. I thupi uh hi Gamthim salvak ding in ti a hi'n, Pathian Nasepna tawh kisai ah Lalpa'n sep di ei piakte lak ah masapen leh pawimawpen ti leu hin le kigen khiallo di a hi (Nasepte 1:8). Gamthim i ti phatleh thîldan zat chuam chuam a um thei a hi.

Gingtu masate thîldan in gen talei gamthim chu gam mawl, chawndan, khawsak dan ah le mawl, Pathian thu he kha nailo thingbul, suang bul bia ah khawsa, nîk leh puan na tiang le chenglo/ aklote genna a hi tangpi deu sek hi. Ahinla, tulai khawvel a hung changkangna tawh

kitawn in Pathian thu hetna lam in a lah hesuak nailo leule khawvel hiatna leh pilna leh hausakna lam kai hin a changkang ma ma un muthei a hiu. Zia a hi zing lai in gamthim nasepna ding hi gamlatak inle a um jing in, naicha inle a um jing a hi. Ziate hi vak en khawm hitiu.

1. MUN GAMLA

Ei uh Tangphai Synod sung ah kikhakhawm kochuam te hi le i vangphatnau pakhat a ka het chu gingtu tamtake'n tuni tiang ah gamthim veina i nei uh a hi. I veinat gual ngei un haksatak kawm hi ziang lehle mimal, inkuan, kochuam, bial leh Synod natiang in pan lak thei dan dan in i lau a, Pathian puina leh kithuapina zal in mission field bangzat hem bang i nei tau ah, i kipak un, i lawting ui le i ti thei a hi. Ziagual ah gamthim veina lungthim pu thei ding ah Lalpa'n eila guat hi i vangphau a hi.

Gamthim nasepna lam kai tawh kisai i hatto zelna ding ua pan nasatak lak ah, kalbi thak thak le i ngaitua ua, gamthim tamtak salvak thei zel ding ah

malam kal i suanto zel ngai a hi. Zia gamthim nasepna Lalpa'n nang leh kei mawpuakna a kaw i a hi ti hetmillo ah pan nasazaw diak ah la ding in i kichial uh a hi. I septhei hun sung ah lam khat bek ah gamthim nasepna lam ah masawn theina ding ah pan i lak ua, ngaituana le i sen thak uh ngai ma ma a tai. Nang leh ken pan i lak/sep zawlo tâk nung tiang ah le gamthim nasepna a pawimaw dan a hung seilian zel di i tu, i chate, leh i Kochuam mipite kiang ah i hil sawn ua, i tîl hat ua, amau ettawn thei di nasepna sulnung i nutsiat piak uh ngai a hi. Zia gamthim nasepte va sem piting ding in, a nai leh gam gamla tak tak ah te'n missionary te i sawl ua, amau in le sawl a hi gual ngei un septhei dan dan, panthei dan dan, genthei dan dan ah te panla a hung sep zia k un gamthim tamtak a va salvak thei uh a hi. Zia gamthim salvakna na sem ding ah mawpuakna lian tak neite i hi zia k un thilpiak leh pauchapnate'n pan i lak uh ngai a hi.

Lalpa'n sawlchak paul hi Judate leh Gentelte mit hi vak

piak ah, thim apat vak ah va
puilut ah, setan thilhitheina
pat va hukdawk ah, amau
tawh ginna zâl ah Pathian
golua theina nasep sem ding
ah a sawl gual in, nang leh
kei le ei sawl vek a hi. Zia
nasepna hi Lalpan i khawvel
damsung ngei a i sep ding ah
i liangko ua ei ngat piak ahi.
Gam thim salvak thei ding in
Lalpan hun suhat chiat zing
tahren.

Gamthim nasepna a hung
hat phat leh kochuam mel a
hung kilang pan thei bep ahi.
Kochuam khat, pawlpi khat
hingal ah, gamthim nsepna
lam ah basam i hi khak ding uh
ti zat um tak ahi. Zia nasepna
sem ding a chun Lalpa apat
bang gual phutna la dawng
em ti hi kingaitua ngai ahi.
Nang ma taksale a hung phut
thei in, chuleh sum leh pai,
tha leh zung apang ding inle
ahung phut thei a hi. Nang
le kei kipiak na zal a hechian
theilo khat in hetna dik tak
a nei ah, muchian theilo
khat in muchian theina a nei
ah, kipak thei ngailo khat in
kipakna leh nuina mêl a put
thei hi Lallukhuk lopi mama

chang la ti gel dawk thak a
pan la dingin Lalpan ei phut
ahi.

2. MUN NAI

Gamthim nasepna tawh
kisai mun gamla a ten sep thei
dan dan, pan lak thei dan dan
leh genthei dan leh thaw thei
dan dan in i la pang ua kipak
aum ahi. Zia ahi zinglai in i gel
phak keilo uh i kiang kim nai
cha hinle gamthim nasepna
ding tamtak a la um ahi.

Lal jesun “kuang ei
sawkpipa ngei hin ei matsak
ding ahi” a ti gual chun nisin
zansin a ichen khawmpi i
cha leh naute leh i kochuam
chanpi sung ngei in het phak
kei loin Setan nasepna nuai
a puk lut ala tam mama
ta hi. Ni dang a i het phak
keilo siatna zatchuam ten
tam tak innsung, kochuam
leh khawtang ah nasa tak
in na hun sem in, Kochuam,
innsung leh khawtang tam
takin a hin siatna, kana,
zawwna, lungkhamna,
beidawwna, kitha kimatna,
etc, ala tung ta ahi. Zia haw
zosia hi abik takin Kochuam
ten bang gual a panlak ah

dodal ding a diam ti ngaituana thak i sen uh ngaita mama in a kilang ahi. I point masa i gen gamthim nasepna tawh kisai mun chuam, gamchuam pan i lak nau hi a pha puai tina lampang hilo in, Donal Trump President ahung pan kit a :America First” a ti gual machun gamthim nasepna lamkai inle gam dang leh paudang thaw te kiang a chanchinpha nasepna chu a first a kawilo in Eima insung, kochuam leh khawtang lampang hi first a i kawi mai uh le pawimaw na chang hung umpan ta in a kilang ahi. Zia gual ngaidan hung pawt jiang a mak na e ti thei tak le ahi. Vak et ziang inle mu thei a tai. I kochuam mi leh sa hingal, nising a khamthei a ki hel, in leh lo ale kilawi na chang le he phata lo ah guk ding chak ding hawl ah, nisin a khosa jing te dinmun i et phat leh puaknat um mama ahi. Ziate chu kua midang le hilo, nisin, zan sin ah i khawsak khawmpi te lah ahi ngal un, Amau te haw hukdaw na ding nasep chu a chang leh a first i kawi uh

ngaita hilo ahem ti ngaituana ei nei sak a hi. Zia ding a chun kochuam tin leh mimal, bial leh synod tiang in, a chuam bik in budget bang kisiam henla, midang, namdang, kochuam dang te va huap pha zo kilei le eima insung, kochuam sung leh khawsung bek huap ah panlak ding dan bang ngaituana nei thei lei a pha diam ti lungthim ei put sak ahi. Zia i gen chun, mun chuam gam chuam a i gamthim nasepnate hi tawpsan tai tiu tina hi keilo ahi. , Gamthim nasepna lamkai pan nasa tak i lak zinglai un , zia hile thil pawimaw khat in vak nei thei lei ti dawina ziaak a hi.

Zia ding tawh kisai in, Rehab centre ahi lo leh counselling centre bang kinei henla, amau te huk daw ding dan chu ngaitua ei gel dawsak ahi. Pathian zalin zia gual nasepna lam ah panla thei ding pastor te lak inle zilna sang tak tak neite bang i um tau va, amau tenle pan a lak theina ding ua a lampi vak siam piak hi pawimaw mama in a kilang ta ahi. Pulpit tang

ahinle i hagen chiat vek uh le kaging chan, zia ban ah chun khen khat ten crusade ahi lo leh camping te bang i nei pi ngei ding uh ka gingcha a hi. Ahinla ziate bep hi hun tawk ah ngailo in, amaute hukdaw na ding in a bik takin pesonal counselling bang ki ha bawl theile a pha diam tin ngaituana ei pia ahi. I kim leh kiang nai ah um sun leh jan a zu leh khamthei thil ah kibual taksa leh thagau ah le kinepna him him neitalo tamtak umte hi i kimulosak ding uh hi tizat um tak a hi. Zia haw veina lungthim/ lunggel i nei masiau hi bang gual in thugen in, lâ sa leu hinle Pathian leh kochuam det tak mel hi kilang theilo di a hi.

Leng Hezekiah hi Pathian ginna lam ah le hat mama khat ahia. Ahinla pathian in zawlnei Samuel mangcha a insung tutup ding ah phûtna a va nei mai hi thil lamdang tak chu a hi. Ziagualma chun insung khenkhat taksa leh

thagau dinmun ah mite'n a suan ma mate insung bang in gamthim nasepna di bang a lah um thei a hi. Insung suktupna lam ah lawsap ziak chun drugs addict bang a lah um thei zel a hi. Zia ziak chun, gamthim nasepna hi i insung ah le a mamaw thei hi. Insung tamtak le gam thim a suak in, vak thilhitheina chun mun a chang zo talo a hi. La insung chu vak tak ah la ngai lai in thim tak a lah hi phut thei a hi ti hia'n kiveng pha chiat hitiu. Zia chu gamla hilo naicha um a hi. Lalpa'n sawlchak Paul hi judate leh gentelte kiang ah sawl gual in nang leh keile ei sawl di hitaleh ei sawlna di mun chu i insung, i kochuam sung leh khawtang thimtak lak a vâk pe ding in ei sawl maithei a hi. Gamthim salvakna nasep mun gamla leh nai ah te semthei zel ding in Lalpa'n ei kithuapi in, ei suhat chiat zing ta hen. LALPA'N simtute zosia hethiam thei chiat ding in hun malsawm ta hen.

JESU KHRISTA ZUITU GINUM

*Rev. Thanglianlal
i/c New Lamka Pastor Bial*

(Luka 9:23)

***“Ama chun a leng ua kiang in, kua’n le ei zui a nawp chun,
ama leh ama kihemil in, nisin ama Kraws kiput in ei zui
hen”.***

Jesu’n Khawvel ah Pathian na a sep lai in nungzui ding in mi a chial ah, khenkhat chun a ngaisâng thaw ua, ahí’n, mi tamlo in ginum tak in ama a zui u’i. Tuni tiang ah hin le mi tamtakte’n Khrista chu a ging ua, ahinlah, ginum tak ah zui a tawm ua, Khrista â ding ah a hinnau pedawk ngam a vâng ma ma u’i. Jesu’n mi a ko phatleh ama gingchât bep a dawí pua, ginum tak ah a nungzui ding in a phût sek hi. Nungzuitu ginum hitheina ding ah chun, mani kipumpiaknate, kilatdawnate leh thumatnate hi a pawimaw hi. I Bible chang têt ua pat hin ginum tak ah Jesu nungzui chu bang gual a hi em ti point pathum taklang hitiu.

1. Zuitu ginum chu ama leh ama a kihemil sek hi

Jesu’n, “Kua le ka nung a zui nawp chun, ama leh ama kihemil in...” a tia. Khrista nungzuitu chun Khawvel thilte sang ah chunglam ah Pathian thilte a lungthim

in a kawi pawimaw masat di a hi. Mihing lungthim ah, chaponate, mani masialnate, du-amna leh itsiknate, ama â di bep ah hin nawpnate leh ama lawkna di bep a ngaitua sekte paitha, Khrista lopina di dawí ziaak

ah kingaitawm tak ah hinte a têt zaw sek hi. (2 Ko 5: 15). Mihing lungthim ah hin eima bep kingaikhawkna a lian ma ma sek ah, i nawpsakna di, i kipakna di, i minphatna dite thîl in nâ i sem sek ah, i lungtup leh buaipipen chu midang phatna sâng ah eima phatna di a hipen sek hi. Nungzuitu ginum chun ama dawidan sang in Pathian dawidan a hawl sek ah, ama dawidan thi sak in khrista dawidan a hawl sek hi.

Jesu Khrista ngei khan le zia hi a lah taklang zota, Pathian thunuai leh a sawltu dawidan in a kipetha, dinmun niampen têt in a kiphaniem hi. Zia hi gingtute'n nisin in kidawng sek leu hin a dawum hi. Keima dawidan bep ah hing ka hi em, ahiloleh Khrista dawilam zawk ka hinpi sekna em? Jesu Khrista nungzuitu ginum chun Haksatna mun in le Pathian dawidan a têt zel sek hi.

2. Nungzuitu ginum chun ama kraws a kiput hi

Jesu'n, "... Nisin ama kraws kiput in ei zui hen"

ti'n a gen hi. Jesu hunlai leh tu hun tiang in Kraws chun thawknate, mualphonate, etsannate, thinate a etsak hi. Jesu Khrista zâl ah bang gual haksatna thuak di hileu hin le a tawp tiang ah thuak ding ah kiphai tak ah kipiakdawna a pawimaw hi. Khrista nungzui hina hin chona tamtak maitua di i nei chu – midang hiatthiamlonate, sawiselinate, mudanate, a min zia ah vawkna tiang le thuak thei zing i hi. Ziate hi i ginnau patepna, a tak leh a lêm hiat chianna le a hi. Gingtute chun, haksatna chuam chuam i tuak hun in le i ginnau zamsan mailo ah i tukdet zel ua, Khrista â ding ah ginum tak ah i pan zing sek a kûl hi. Thawkna/ Kraws hi tawh gingtu hinkhua hi kikawpvai zing leh chiakhawm zing sek a hi ti hemil pua hitiu. Thawkna mun ah le zuitu ginum, Khrista â ding ah kipumpiak hinkhua i matzui zing a kûl hi.

Kraws hin taksa pawlam thawkna bâk ah thina le a etsak hi. Kraws chu migilote

thisakna mun a higual in, mimal dawidante, mimal kingaisannate thîsan ah Khrista dawidan hinkhua letsak zawkna le a hi. I sum leh pai matdante, melmate chung ah i lungput dante, kihinsuana di i dawitêldante zosia ah Pathian thu gual zel ah kitukniam a ngai sek hi. Kraws lampi hi haksa maleh nisin ah eimalam thina tawh a nungzui zel hi zuitu ginum hina in a kengkhawm chu a hi.

3. Nungzuitu ginum chun nisin Khrista nung a zui zing hi

Jesu'n, "... ei zui hen" ti'n a thutawpna'n a gen hi. Khrista nungzui umzia i genzo ta, a ma entawn ah hinkhua mang zing genna le a hi. Nungzuitu chun Thumatna hinkhuate, hepinate, kingaitawmnate leh ginnate a pawdawk pek sek hi. Khristianna hi Pathian thu hiat leh ginchakna bep ah kichai ziang a hipua; nisin ah Khrista tawh kitawn khawmna a panlo chun a

bukim thei seklo a hi. Lalpa zilsakna thu zawm ah, a ma hin gual ah hing in kal a suan zel sek di a hi. Nungzuitu dik tak chun, Khrista thuzawp a ngai pawimaw, a taksanna chu a hinkhua'n a pawdawk ah, Nisin ah a thupuknate, a thugendawte leh a nasep-thilbawl zosia hin Khrista mizia a suhlang sek hi. In ah a umlaite, a nasepna munte, Biak In lam leh a lemchangna mun zosia'n a khrista mizia a suhlang zel di a hi.

Thukhakna

Nungzuitu ginum chu Khrista â ding ah kipumpiakna hinkhua hi a hi. Gingtute'n zia lampi hi a zui uh a hi chun Jesu Khrista zuitu dik tak a hinau midangte'n le hethei intin uh, Jesu vâk a mau ah muthei di a hiu. Tunî hin, Jesu nungzui ginum hi ding in i kipumpiaknau suhthak hitiu. Thu mai hilo in nisin i hinkhaw matdan zosiau in i sulang zel sek ding uh a hi. Amen!

EI KO IN

~ Rev. Lalpiaklian Vaiphei
i/c Gangpimual Pastor Bial

***Ei ko in, chutileh hun dawnhu ing ka tin, la het ngailo thil
thupi takte leh kiselgute hun hil ding ka hi. Jeremiah 33:3***

Ei ko in ti kampau hi thu pawimaw leh ngainawp um tak paucam a hi. Zia hin, kinepna thak leh bang a h'em chan di, thu kipak um tak chun zui ngei ina ti hi a hiat thei a hi. Zia paucam hi Jeremiah 33:3 in a muthei hi. Thucha lopitak zawlnei Jeremiah suangkul ah a um sung ah Pathian apat a dawn a hi. Zawlnei Jeremiah â ding ah chun kinepna thak siampiaktu a hidan a kimu a hi.

Mi zosia hin haksatna i nei chiat ua, i haksatnau vang kibang khel puana. Zia haksatna kipat zalenna chu ama ko ah ama ah kipiaklutna chun ei zalensak thei hi ti hi. Gingtute hin i mangbat lai leh haksatna namenlo i tuak hun inle, pauchapna hing tak mang in ama ko ding in ei hil a hi.

Zia thupi pawimaw tak a pat in, zia a nuai ahte hi vak zil khawm leu hin –

1. Pauchapna hing

Pathian in ama nai ah, kingaitawmna tawh kote chu ama phatna ding in a dawnhu sek hi. Mihingte hi i lungkhamna leh beidawn hun ah hin dutui tak, hing tak ah, ama, Pathian ko hi thil bailamtak chu a hi puai. I basap leh ama i mamaw laitak ah kilang a hi ngala. Ahi'n, ama ah kitulut ah, nai mite kona chu a dangdak ngaipaw ngala. Mi kingaitawmte chu Lalpa kipakna a hi gual un, suan

di bangma neilo leh tinglo ti kihechian ah ama kote chu Lalpa'n a ngaisaklo ngai puai. Ziagual ah mani kihechian ah ko theite chun pauchapna hing tak nei in Pathian a ko thei sek ua, Pathian suhkipak in, pauchapna hingtak a neithe sek uh a hi.

2. Thil lopi leh kiselgu:

Thinlung thiangtho leh kipumpiakna tawh ama i ko ah i kilat uh a hi chun, mihiamte hiatphakna khel lam ah Pathian in thil lopi tak leh kiselgu ama gingtute â ding ah thilpha ei musak in, i haksatna zosia ei lak mang piak sek a hi. Gingtute hin haksatna i hung tuak tak tak phat uh leh, i haksatna ah kipat pawtdawk zo talo ding ah kingainate, pawt ngaina le hetalo, kinepna mawng mawng nei talo in i kingai sek ui. Zia hun ah chun, Pathian chu i ko uh a hi chun thil lopitak ei musak in mun sangzaw'n ei lāngkai di a hi.

3. Sualsimna leh kipuandawna

Ei ko in ti hi soal simna leh Pathian ma-ang ah kipuandawna tawh ama nai

ding in ei chial a hi. A ma i ko lai ah hin soal ti kihia ah simna thinlung pu ah Pathian ma-ang ah i kipuang di a hi. Zia kipumpiakna leh soal simna ah hin Pathian tawh kipawl na thûk tak ei neisak sek a hi. Mi kua le soal a hi ti kipawmte chun, amau ah phatna him him a mu ngaipua, thiamlo kichanna ah dim in a sualnate chu imlo in Pathian ma ah khek neilo in a puang zawsek a hi. Zia kipuandawna ah chun Pathian lungthim suhkha in Lalpa pawmtak a hung hisek u'i.

I tulai dinmun teu i vak enna, i gam dinmun uh, i Insung dinmun leh i mimal tin uh i vak ki-etchian uh a hi chun, taksa khawsakna leh thagau lam tiang in le Kinepna di dang mawng mawng neitalo in i umzo tau a hi. Hinkhaw thak ah bulpat phat theina ding un i Pathian uh i ko ua, ama'n i mu ngailo thilte ei musak ngei ina ti hi gingla puai tiu. Pathian chun, i gitlonateu thupha chaw in a kengbul ah kûn ah kipumpiak ah ama ko di'n ei chial hi.

LA DINMUN

~ *Tv. Kevin Golian*
CKKP Assistant Leader

Khawvel ah mihing zosia hin dinmun a kinei chiat ah, a ching a thiam a zawng a hau te'n le dinmun i nei chiat u'i. Dinmun hi a chi chuam chuam a um ah, tuni'n i gamsung en lehin, nam puitute, kochuam puitute, khawsung vengsung puitute'n le dinmun i nei chiat u'i. Vak gensau deu leu hin, sawlkar in le dinmun a nei ah, insung dinmun, sum leh pai dinmun, taksa hinkhua dinmun leh thagau hinkhua dinmun le dinmun khat a hi. Tuni'n i gamsung dinmunte i et in ut leh utlo thu le hilo in gal neidan in i lah um ta mai ua. A chiasa 03rd May 2023 apat tuni tiang in gal a bei naipua, i hetlo kal in i kiang i kîm a thil tung ten ei gingtute dinmun le nasatak ah susia mama in a kilang hi. Insung dinmun tampi a suhsia, mi tamtak in luang leh ban, in leh lo, khua leh tui i chan u'i. Zia ban a chun sum leh pai, nek leh chak hawl na dinmunte le ah suhsia, zillai naupang, nungak tangval hinkhua dinmun hawilai tampi suksiat in a um hi, taksa hinkhua a siat leh thagau lam hinkhua le nasatak in a kichau khawlaw thei hi.

Ziagual dinmun a chu ding leh he thiam lo le mi a ki-um i hi zinglai un gingtu khat in ah, ahinla a dinmun hethiam pilvang tak a i mimal dinmun ah a dinmun tawh kituak teu ki het in i dinmun taw ah hinkhua mang le a ki-um ki tuak a hinkhuau i mat uh kit tho sam hi. Pathian in a poimaw mama hi. Alang mihingte eimau dawitelna khat a mani dinmun hetheilo a hinkhua mattheina (Free

will) ei pia, mihingte â ding ah i vangphatna mamau chu Pathian phatna leh ei lungsiatna hi a hi. Mihingte hin thilpha ma ma hilehle ei ma utna leh dawitelna panglo ah ei kibawlsak guat phatleh a ki-ut ngaipua, himaleh thumatna a pawimaw ah, eima utna hilo maleh thumang tak ah thilpha i bawl ah lampi dik leh lampi hawi i zui chun malzawl na a hi. Thumatlona chun vangsiatna leh thina a tunthei hi. A ziak chu gitlo man chu thina a hi (Rom 6:23).

Bible apat in Adam dinmun vak en hitiu.

Genesis 2: 15 Lalpa Pathian in a pawsal siam chu a pui ah Eden huan kaitua di leh veng ding in a kawī tai. 16 Lalpa Pathian in “Huan ah thingga zosia la nawp nawp la nethei hi. 17 Ahi’n la, a sia leh a pha hetna thingga pen hi la nêk di a hi puai; la nêk ni ni’n, thi di la hi, ti’n thu a pia.

A dinmun

1. Eden huan kaitua di leh vengtu di a hi.
2. Eden huan ah a sia leh a pha hetna theigga tilo

a dang cheng ne thei di dinmun in a um hi.

3. Eden huan ah a sia leh a pha hetna thingga a nêk leh a nêk ni ni’n thi di dinmun in a um hi.
4. A ma utdan ah khawsa ding in a um pua, Pathian dawidan le Pathian thupiak dungzui ah khawsa thei di bep dinmun in a um hi.
5. A pawimaw dungzui ah Pathaintawhkipawlkhawm sek di dinmun in a um hi.

Adam in a dinmun tawh et in a bawlo di, a dinmun lo lamtak in a lah khawsa kha ta, neklo di a sia leh a pha hetna thingga a neta, Pathian lungnatna a nuai ah gual hin a tung ta a hi.

1. Ama chun, “Huan ah la thawm ka hia’n ngawnchang ah um ka hiziak in ka lau ah, ka kiselgu a hi,” ti’n a dawnhu a (Gen 3:10).
2. Chuleh Adam kiang in, “La ji thu la nung ah, thing pakhat, a ga la neklo di ti ah thu ka piak, la nek ziak in, leisiat hi nangma ziak in, hansialaw in a um tai; la damsung sia gim tak ah

sem in a ga ne ta'n la (Gen 3: 17).

3. Ling leh khaute le hun kedaw sak ing ka tin; la thaichinte bep ne ta'n la (Gen 3: 18).
4. Leisiat ah kipat siam la hi'n leisiat ah la kile'kit masia, la mai ah khawsa-ul luang zut zut kawm ah sem gim in, an ne ta'n la tin nangma leivui ah siam la hi'n leivui ma ah kile'kit di la hi'ngal ah," a ti tai (Gen 3:19).

Adam apat i mu uh leh i zil ding ua hawi chu i dinmun tawh kituaklo ah khawsak khakna hin i chung ua Pathian lungnatna leh thina chanpha a hungtun thei in, Pathian lungnatna i tu leh cha khang in le a tung thei hi. Adam in bang ding ah ziagual thil bawlo di a lah bawlkha a hi diam? a dinmun helo leh a dinmun geldawklo in a ma mimal utna leh dawitelna a mat khak zia a hi. Zia zia chun i kîm i kiang ah thiltungte hethiam in eima hinkhua ah i dinmun ei suhsiathei, sukhkhathei di tiang ah pilvan ma ma a pawimaw hi. Thilhawi thilpha

zosia hi le ei â ding ah a hawi leh a pha bangma le a lah hizianglo a hi, "Thil bangkim bawl phal a hi, himaleh, thil bangkim bawl chu a pha diak puai. Thil bangkim bawl phal a hi; himaleh, thil bangkim bawl chun ei siampha diak puai (1 Cor. 10:23).

A dinmum hethiam ah khawsa, Pathian dawisakna leh Pathian malzawl na chang mi khat en kit hi tiu.

Joseph Gen. 39:4 Tichun, Joseph in a pu hepina a chang ah, a na chu a sem sek ah, ama chun le a inkuante chung ah hotu'n a siam ta'n. A nei zosia chu a khut in a kawi tai. Joshep dinmum hi dinmum pawimaw mama khat a hi ban ah dinmum neu hilo a hi. Potiphar in a in enkawl hotu'n a siam ah, a nei zosia enkawl leh kembittu ding ah mawpuakna a piat. zia kawmkal ah chun Potiphar zi chun Joshep melpha tak chu a enla ah, a luppi ding in a zawl ta, himaleh Joshep a ut puai (Gen. 39: 7-10). Bang ding ah Joshep utlo a h'em? A dinmun a kihet ah a hi. Joshep dinmun bang a h'em?

Potiphar in a in leh a nei zosia enkawltu ding ah muang tak ah a guat a hi ti a kihetchian ziaak a hi.

Joseph in a dinmun a kihet ah ginum tak ah a khawsak ziaak in bangti'n a hung um em?

1. Genesis 39:21 Himaleh, Lalpa chu Joseph kiang in a um pek ah, a chung in a ngilnei ah; suangkul vengpa hepina a dawnsak hi.
2. Genesis 39:22 Suangkul vengpa chun suangkul ngak zosia chu Joseph khut in a vawpsak sik sek ta'n, thilbawl di zosia chu Joseph khut in a kawi tai.
3. Genesis 39:23 Lalpa chu Joseph kiang in a um ah, a thil hi'tapo chu Lalpa'n a lawtinsak ziaak in suangkul vengpa chun a khut ah thil um tapo chu a en se se ta puai.
4. Genesis 41:25-36 Joseph in Pharaoh mang a letdawk hi.
5. Genesis 41: 37-43 Joseph chu Pathian in a um pi ah, Pharaoh in a chawisang ah, Aigupta gam zosia'n

vaihawm in a pansak tai.

6. Genesis 41:57 Zia bep chule hilo in, lei chung zosia ah kial a nasat ziaak in, gam tin ah mite chu püksui ding in Aigupta gam ah, Joseph kiang in a hung sek ui.

Joseph in a dinmun a kihet ah, a dinmun tiang khêlval in a khawsa pua a ginum ah, Pathian a lau ah, tichun lamdang tak leh lopi tak in Pathian in a malzawl hi. A pa insung mite, Aigupta gam leh gamdang mi tampite â ding in kial a pat hukdawktu in a pang hi. A ma dinmun kihet ah, a dinmun khêlvâl ah khawsalo ah, ginum tak leh Pathian lau kawm ah hinkhua mang a khawsa mi chu Pathian in a kipakpi in a malzawl hi ti i mu thei uh a hi.

Gingtu hinkhua ah mihing hina zal in i kîm i kiang ah thiltungte le thil suakthakte'n ei hung sukkhâk di a bailam ma ma hi. Adam leh Joseph in le a thiltuakteu kibanglo maleh a kîm a kiang ua a thil tuakteu in a sukkhâk a hi gel gel uh a hi. Himaleh vangsiat

um tak leh daw-umlo tak in Adam chu zaw in a um ah, ahinla Joseph chu zaw in a umlo a hi. Adam gual hi zawlo in Joseph gual ah eima mimal dinmun hetzing a ngai hi. Tunin i dinmunteu zosia chung ah thuneitu chu Pathian a hia, kua hitaleh ama dinmun ah Pathian neilo chu a chung gik di a hi. Tunin ei uh haw hi le chi leh nam ngaina ma mate i hui ah, Pathian nei khalo zen a chi leh nam ngainat, kochuam pawlpi ngainat khak thei a hi. Himaleh zia chu Pathian kipakna hilo a hi zia in i dinmun chiat un ginum in Pathian nei chiat leu hin Pathian in i chi i nam teu, i insung teu leh i hinkhuateu ei malzawl ma ma di a hi. Joseph in a dinmun a kihet ah Pathian lau zingkawm ah a khawsak zia in, Pathian in a malzawl ah, a pa insung mi a malzawl ah, a gamsung mite a malzawl hi. Ziagual a chun nang leh keile Joseph gual in i dinmunteu kihet in ginum tak leh Pathian lau kawm in

khawsa zing leuhin Pathian in ei malzawl thei ma ma a hi.

Chi leh nam nasepna vai ah dinmun i nei kha maithei, khosung vengsung kivaipuakna vai a dinmun i nei khamaithi, kochuam lam a dinmun i nei kha maithei, ahiloleh nek leh chak sum leh pai hawlnalam ah le dinmun i nei kha maithei. Zia tak ah i het ding ua daw-um chu la dinmun kha nang dawidan ah matgawlo in Pathian dawidan ah mang in, la dinmun a pat chi leh nam, gamsung, insung dam na ding leh Pathian lopina ding in na lasem thei a, Pathian phatna la suhlang thei ma ma hi ti hemil kin. A zia chu “A lunglam sem ding ah sepnawpna hun pepa chu Pathian a hi ngal a”. Philippi 2:13.

Simtu zosia Pathian in i mimal chiat un ei mau dinmun chiat ah Pathian phatna suhlang gingtu hi thei chiat ngei ding in ei malzawl chiat ta hen.

MIHING HIN ZIAK

(Genesis 1: 26-28)

~ *Upa Douminlian*

Thumapui: Mihing hinkhua hi I ngaitua a hi chun, “Hin ziak” hi bang a hi ta diam le! Mi lopi tak mai hi di te, officer lian deu tak mai hi te, mi hausa tak mai hi te, lekha thiam tak mai hi te, leh mi lawting tak mai hi ding te hi I hin ziak a hi I ti mai thei e. Pathian thuin a gen dan in Pathian in mihing te a siam ziak chu ama lopina ding , kilaichinna pha tak neipi ding , leh ama hina te puandawna ding te hi a hi zawi. Chawmcha’n gen ding hi ta le hin, “Pathian chawihawi leh pak ah a na sep” hi ding in ginchak a um hi. Zia te chu I genchian thei dan dan in zia a nuai ah gual a hin vak genchian gua hi tiu.

1. Mihing te hi Pathian pak leh chawihawi ding ah siam I hiu:

Pathian thu, 1 Korinth 10:31 na chun “Chutichun, la nek unle, la dawn unle, la bawl taphawt uh chu Pathian lopina ding in bawl un” a ti a hi. Thilsiam dang zosia’n le amau siamtu Pathian a chawihawi chiat uh a hi. Mihing tamtak in zia thu hi hethiamlo ma leu hin le, zia thu hi a dik tak chu hi ngei in ah, a ziak chu Pathian pak leh chawihawi hin mihing

ah kipakna tak a tun sek dan hi mi tamtak in I tuakkha ngei uh a hi. Mun dang – thil dang ah ten kipakna I hawl sek ua, ahin lah I muzo diak seklo uh a hi. Kipakna nei ding hi lah mihingte’n I mamawpen te lak ah pakhat a hi ngal ah. Siam ah I um gual un um leu hin kipak mai lo ding I hiu em, maw! Hung un ei siamtu’n ei siam gual ah um ta ding in ama kiang lam ah kile kit tai tiu. I vaitham sawt ta law tau hi. Pathian chu pak in

chawihawi leu hin I mamaw ma mau kipakna chu nei ding I hui, a thatnawp um na lawm lawm e, khai!

2. Mihingte hi Pathian nasep ding ah sim ah um I hui:

Pathian Lekhabu Thiangtho, Bible ah Joshua'n "Kei leh ka inkuante'n Lalpa na a hi ka sep ding uh" a ti a hi (Joshua 24:15). Pathian mi, Joshua hin chu Lalpa lemguatnate hi hechian ma ma hi'n ah zia gual thupukna dik tak mai hi a lak ziang thei hi. Mihing tamtak te hin chu zia thudik hi I hethiamlo uh hi'n a kilang hi. Pathian nasep I ti hi full time mission worker pakhat va hi ah sep ding ti hikhel puan tin, Pathian launa tawh thilpha bawl hile Lalpa nasep hitho ding in a ginchak um ma ma hi. Pathian in ei hepi gual ah kihepitanataw, kithugualna tawh, kipumkhatna tawh, diktatna tawh, kukalna tawh, thianthona tawh, ginumna tawh theitawp sua in sem leu hin Pathian na hung chang ding in ka ngaitua a hi. Chuleh, Thugentu 12:13 na'n hiti hin a gen hi, "Pathian lau in la,

a thupiakte zawmin, zia chu mihingte bawl ding chu a hi."

Thukhakna:

Chanchinpha Matthai ziklam ah I muthei chu, "A gam leh a felna hawl masa tau in" (Matthai 6:33) ti hi a hi. Pathian ging ah ama dawi dan tak ah hin hi 'A gam leh a felna' tina hi di'n ginchak a um hi. Mihingte'n khat leh khat a ding ah I kidawisakpen ding ua ka ngai chu 'Hukdamna chanchinpha' hi ahi. I Kochuam Thugin in ei gen chu, "Khrista chu ging ah a thupiak zawmtute chu hukdam hi'n au" (Thugin-VII) ti hi a hi. I insung chiat unle mitin Thagaulam hinkhua ngaikhawk in neipen hi tiu. Pathian pak leh chawihawi ah, ama na sep hi I hin zia uh a hi dan hi hechian in, zia gual a chu hing ding in kisai tiu. Zia ngei chu a gam leh a felna I hawl masak nau hung hin tin, chutileh Pathian bangkim hithei leh bangkim chung ah thuneitu chun I mamaw dang teu le ei pe ding a hi. Lalpa'n a thu ei malsawm piak tau hen!

THAGAU THIANGTHO HUNGNA

~ Rev. Thianginlim Vaiphei
i/c S. Kawtlian Pastor Bial

Penticost ni a hung tun phat in, amau chu a leng un mun khat in a lah um khawm un. Thakhat in van ah kipat hui hât tak gi tawhbang a hung tung ah, zia chun a kichutna Insung uh chu a lua dim ta’n. Meikuang gual ah kilang lei a hung um ah, a hung kihawmjak ah, amau haw a chang chiat tau a. A leng un Thagau Thiangtho in a hung dim tau a, Thagau in a pausak dungzui in pau dangte’n a hung pau tau a hi. *(Nasepte 2:1 – 4)*

“Bang hilehle, ama Thagau thutak chu a hung tun tak leh, thutak zosia’n hun pui lût intin, ama phuak kawm in thu gen pua’n tin, a het tapote chu gen intin, thil hung tung dite chu hun hiatsak ina.” *(Johan 16:13)*

A chung ah thupi Thagau Thiangtho hungna ti holim di i hi ziak un, zia sermon simtute zosia ka dawisakna ka hung lân a hi.

Thumapui: Pentikos kha Kochuam pianni a hi. A masapên leh a khatveina ding ah Thagau Thiangtho, Pathian in mihing pathumna chu ei chênchil ding in a hung pe ta’i. Khrista khan zia lei ah a nasepna hun nunung lam ah khan zia thamuantu Thagau Thiangtho hi piak ei tiam zing

sa a hi kha; “Ka chia chu nang uh ding in a pha’i, ka chia chun zia thamuantu chu la kiang ua hung di a hi ngâl ah” tia ama’n a lah gên kha. Pentikos kha a thutiam tunni chu a hi. Pa khut changlam ah kipat in a lah ngâk zing kochuamte kiang ah Thagau Thiangtho a hun sun thâkna ni chu a hi. Ama a hung kilat kit masia a chênchil in, a suhhât ah, a thamuan sek hi. Thagau Thiangtho piak a hi ma deu ah Baptistu Johan khan a hung di thu kha a gên lâwk

ah, zia chu Jesu Khrista khan le a namdet ah, a tak in ziltîlte ah khan a hung tung kim ta a hi. Johan thugên lâwk khan “Ken chu simna ding in tui in ka Baptis sek ah, himaleh ka nung ah hung di pa chu keima sâng in a lopi zaw’n, kei chu a kêngtawdap khau phel tâk le ka hi pua’i. Ama chun Thagau Thiangtho leh mei in hun Baptis in ah,” a ti a hi (Matt 3:2).

1. Sâwlchâkte Thagau Thiangtho a channau:

“Chun a um khâwmnau ah chun Ama le a pang ah, Jerusalem khawpi chu nusia kiu in, Pa thutiam ka gên kha a lah ngâk ta diu in a tia. Johan khan tui in a Baptis sek ah, himaleh ni sâwtlo kâlchân Thagau Thiangtho Baptisma chang in lau” a ti’i.

Nasepte 2:1-4 i sim leh Sâwlchâkte’n a tak ah Thagau Thiangtho a channau a kimu a hi. Pentikos ni a hung tun in a lêng un munkhat in a umkhâwm ua, chun thakhat in vân ah kipat gi thigawpi hâng gual in a hung tung phut ah, zia chun a umnau In chu a hi dim ta’i; chun leite chu ama ah

hung kikhen zâk in mei gual in a kiang ua a hung kilâk ta, Thagau Thiangtho a chang chiat ua, a lêng un Thagau Thiangtho in a dim chiat tau a hi. Zia Jordan lui ah Baptisma changte khan Baptistu Johan in a gên ama sâng ah lopi zaw, a kêngtawdap khau phel tâk le ka hi pua’i a ti mihiam chun Thagau Baptisma chu bangtik leh bang hun ah a hun bâwl di a hi diam ti gênkhâwm sek inau, ti ginchat a um hi. Zia ni chu a hung tung ta’i. Zia ni Pentiost ni chun pindan chungnung ah a umlâi un, thakhatpi’n Johan in a tiam, Jesu’n a namdet chu lopi tak in amau chung chiat ah a tak in a hung tung ta’i.

2. Jentelte kiang ah le Chanchinpha piak:

Nasepte bung 8 na lam ah i mu gual in Samari mite kiang ah Pentikos chu sâwlchâkte pauchapna zia ah chu hung tung in Thagau Thiangtho piak a hi tau. Himaleh Jentelte chu khâk tan in a um nalai ua, Pathian chun bang lam a h’em bêk ah Judate hiat leh mungêi ah Jentelte le Khrista taksa Kochuamte lak ah pang ngêi di a hui ti a hiat sak ah, a kâl ua

bâng chu a phelsiat piak ta a hi. Israel Insung pawlam mite kiang ah le Chanchinpha piak di a hi ti Peter in a muchiannding ah kilâkna piak hial a hi. Chuti chun Peter chu Jentel mi Kornelia leh a sungte kiang ah sâwl a hi ta'i. Pathian chun Pentecost chu Jentelte kiang ah le tângphuang tak in a peta a hi. Peter in le bangma gên di a nei ta pua, zia chu mizosia'n mak a sak uh chu a hi. Baptistu Johan in a tiam, Jesu'n a namdet chu lopi tak in ziltâlte, Judate, Samari mite, Jentelte kaing ah a hung tung ta'i. Tichun Kochuam, numei leh pawsal, suak leh suaklo, Juda a h'em, Jentel a h'em um tâklona chu lopi tak in a hung piang ta a hi.

3. Thagau Thiangtho thamuantu dang:

Ka min ah Pa In a hung sâwl di a ti khel khel hin Bible Thugin Trinity thu a keng ah (Johan 14:16, 25ff, 16:13) 'dang' a ti hin Unitarian-te pawm dân a pai hi. Thamuantu ti hi John Wycliff chun Suhhâttu, suhhângsantu tina a hi, a tí'i. John Calvin chun, Siamphatu hi in a gên hi. Thagau Thiangtho chu napha sêm thei ah gin tâk ah siamtu

a hi. Diktak leh thiangtho a hina chun a hepina a suhbuai pua'i. A pangai zing ah, Pathian tak leh pha a hi zing hi.

4. Thagau Thiangtho leh Halthakna:

Khristiante lak ah chun zia hih min langsal tak a hi. Maleh, zilchian takluat a hi pua'i. Mûtheilo lam tawh kizawpna a tam zia in Bible apat etchian a ngâi khawpmai in, chiakhial pi le tamtak a um tau.

Halthakna chuh hinhthaksak leh sukdam kit, hinkhua siamthak kit tina a hi. Suk thatho kitmai a hipua'n, mihing in tunsak thei a hipua'i. Thagau thiangtho in thutak mang in hiatna leh dawina a siamthak in, Khrista kiang in a pui in, a siamthak sek hi. Lalgam â ding ah nasemtu pha Henry Beth chun, "Halna chu dâitui chîm gual a hi" (Hos 14:5) Daichîm chu zânkhang vân thiang (calm) phatak in a ke sek hi. Zawpmat khâwm phûlna a hipua'n, thilgi leh husa nei ga hilo in, thagau thasetak ah simna leh kipiakna tak tak tawh Jesu kiang ah hung kile kitte kiang ah piak a hi. A changtute chu a siampha sek

hi". Pathian thu kipat ah kisikna leh siamphatna i mamaw takzet uh a hi.

I Bible chun, "Ginna leh sia leh pha hiatna chîm tawh," patep sek unla. A dik leh pha zosia pawmchak ziang un a ti a hi (I Th, 5:21; I Jn, 4:1). Lal Jesu'n, "Ka mite hung hiatsak ding a hiu" tî'n thagau dik nasepdân a gên hi. Mi tamtak in phûl thakna hi halna'n a ngâi ua, bawldân thak siamkawm ah lim hi thagau in a ngai ua, simna panglo kisuklimna chu a kilang mai sek hi.

Martin Luther chun, "A lim chun ngainawp, mak leh thatnawpnâ'n a suphûl sek ah, Pathian thu lamdik tûkchak sâng in limna leh lawkna kilawmtak in a musak sek in, Pathian lam a nutsia sak sek in, thutak a dâl sek hi. Pathian helote leh dawilotute sâng in le a tak chang kiti kawm ah a phalo lam ah mangte'n Thagau Thiangtho a gense nasa zawsek ui. 'Kochuamte le a dodaltu leh zilsakna diklote sâng in a puitute dukdaklona'n a suhse thûk zawsek hi', tia gên a hizing sek hi. Kochuamte hile, 'Halna ah piang,' a ti zingsek sâng un,

'thutak ah hin' leh puihuai hileh phazaw di a hi.

'Pathian piak halna chu a chîm ah, a pha, a det hi. A changte chu a siam pha'i. Halthakkitna'n a tup chu ginna lam ah chau leh puksetate sukhaina, kaithawna leh lampi dik ah siamthak ah, Lalpa dân ah midangte phatna hindawsak hi a hi. Jesu Lalpênna tungding ding ah a mite suk hin leh sukhât hih a hi.

Haldaw a hun takzet ta a hi! A tak sâng in a lim i ngainau ah, champhate (eg.; thi champha, birthday etc) i suhlangsai ua, halna um diaklo in i lawm ua, i lainatte thi champha tiang in i lawm zel tau a hi. Halna diktak chu mimal ah siamthak hinkhua luangkawm di, hinkhawmna siamphatu a hi. Kum zia chan halna dawng zing ta kiti, suai umkhawmna gam hin, 'kisik in kilekit unla, Lalpa apat in halna chu tung thei di ahi,' ti thu, Pentikos ni thugên hi awi thak kit hitiu. A lim mai ah kisuklim kâwm hi chu haisan hitiu. Simna tak tak tawh Lalpa kiang ah kilekit hitiu.

Lalpa'n a thu malsawm ta hen.

MIZOSIA MAMAW CHANCHINPHA

~ *Pi ST Nianglalngak*
Missionary

**“Vansawlchak chun a kiang un, “Lau ki un la, ngaitiam un,
miszosia â ding in Chanchinpha kipak um ka hun tut hi,”
(Luka 2:10)**

Thumapui: Gam mang ah chiana ding helote’n chiana ding lampi hiltu ding a mamaw un, damlo ten le damna ding damdawi a mamaw ui. Zia gual ma chun, gitlo ziak ah chiana ding helo a kumtuang gawtmun meidil zuan ding lai te kumtuang hinna I neithe na ding un, hukdam tu I mamawi ui. Jesu Khrista bep chu zia hukdamna nasep sem ding ah guat ahi dung zui in a hung piang ah, a thi leh a thawkitna thu te bep hi mizosia â ding ah Chanchinpha chu ahi.

1. Chanchinpha umzia:

Chanchinpha (Gospel) ti thumal hi Greek pau ‘euangelion’ a pat lakdaw a hi. A umzia chu “Chanchin kipak um” (Good news) tina ahi. Zia thumal hi Thuthung lui hun lai ah Rome Lêng ten kidona ah, zawna a chan thu genna ah mat ahi. Rom Lêng gam huapsung ah Lêng chapa Pianthu puan nate, Lêng chapa kumkhat a phak thute, Leng lukhuk khuksak

nite leh Leng chutpha a hung puanthute chu Chanchinpha a hung hi zel ta ahi. A ziak chu, Rome Lêng chun a gamsung ah thuneina sangpen leh thutawp puanthei na a nei ah, Rome Lêng khenkhat vang chu pathian gual ah kingaina nei in khuah leh tui hukdamtu in le a ki ngai ui. Zia gual chu ahi ziak in Lêng Inkuan a pat thu pawt him him chu Chanchinpha a hung hita ahi.

Thuthung Thak ah Chanchinpha ahi le chu gitlona pukta mihingte hukdam ding ah Jesu Khrista a hung pianna, a thina leh a thawkitna thu hi ahi. Khawitak mun hi lele Jesu khrista a tunna taphawt in Chanchinpha le a tung sek hi (Mathai 12:28). “ Pathian gam chu a naitai, la gitlo uh haisan unla, Chanchinpha hi gington in ,” (Marka 1:15) tia Lal Jesu’n a la gen khan hukdamna nâ a sep bep a genna a hi pua, A ma ngei a kigenna le a hi ziak in, Chanchinpha a ti hin Lal Jesu hukdamna nasep kha ahia, Jesu Khrista ngei kha Chanchinpha chu a hi ngal hi.

2. Chanchinpha huap phaklo kuama a um puai.

I kingakna Bible chang Luka 2:10 na Belampute kiang ah Lal jesu Pianthu vahiltu Vansawlchak khan Chanchinpha chu ‘ mizosia a ding’ ahi dan a hil hi. Belampu te’n a chanchinpha hiat uh kha gensawn lo ah a kawi mai ding uh ahi pua, a gensawn zel ding uh ahi. Judate leh Greek te â ding bep ah kigen

Chanchinpha le ahi diak lo ahi. Mivomte â ding bep ahi pua, mingote â ding bep le ahi diak puai. Mihausa te â ding bep le ahi pua, migenthei te â ding bep le ahi diak puai. Mipil te â ding bep ahi pua, mi ngolte leh gualpha lo te â ding bik le ahi diak puai. Chanchinpha hi a dawngtu ding bik telchuam a um pua, mizosia khenchuam um lo ah huap a hi.

Mizosia huap chanchinpha a hi zinglai in A ma nawltu leh pawm nuam lo Bible ah mu ding a um kit hi. Juda Sakhua puitu Pharisaite leh Sadukaite’n le a daw puau hi (Mathai 16: 1-4, Mathai 22: 15-34). A seiletna Nazareth khua mipite’n le Jesu kha thing mistri (Carpenter) nasem mi ah a hiat ziak un (Marka 6 :3-4) ‘ Messiah’ a hi na pawm haksa a sau ahi. Lal Herod vang vang in tha ding in a hawl hi (Mathai 2:13). Kum zabi 21 (21st Century) ah hin le mi tampi Chanchinpha a la hekha ta ahinla, a lulna helo a ki um nalai hi. Chun, Khawvel ah hin Chanchinpha he khanailo

him him nam tam tak le a um nalai ui. Chanchinpha a hiat nung ah le pawmnuam lo ah nawl tei tei nalai a hi chun a ma thu ahi. Himaleh, Chanchinpha hi mizosia â ding a hi dan ah henailo te hiatsak chu a hetasa, gingtute te mawpuakna ahi. Zia nasep lopi tak mai Chanchinpha puanzak nasep semding a chun Jesu'n a tatsa te haw ei sawl ahi (Marka 16:15) . Lal jesu'n Kochuam khut ah van gam chabi a kawi ding thu a la gen hi (Mathai 16:18-19). Chanchinpha hi Vangam chabi chu ahia, Chanchinpha mang ah kochuam ten le gam thim ah um te chu salvak ah hinna lampi/ Vangam lampi I pui diu chu i maw puaknau leh Kochuam te ngaikhawk pen ah I gel ding uh chu ahi.

3. Langsâl tak ah Pathian hawllô ten le Chanchinpha a mamaw ui.

Langsâl tak ah Pathian hawllô tên le Chanchinpha a mamaw ui, a ziak chu mizosia hi gitlona nei ngen I hui ah, midik le kuama a ki um lo ahi (Rom 3:10).I gitlo ziak un

Pathiantawh I ki zawp matnau a tan ta ahi. “ Mizosia'n thil ahi khial tak ziak un Pathian lopina a chang zo talo uh ahi (Rom 3:23) A lopina chang zo talo mihingte hin A lopina I changkit theina ding un, Chanchinpha I mamaw ui. Johan 15:16 chun hiti hin a gen hi, “ Nang un leitêl puau ah keiman ka tel jawk la hui. La chiau ah vaga ding leh la gau ah um zing ding in ka guat la hui,” a ti ahi. Ei un Jesu Khrista hi I tel masak uh leh I hawl masak uh ahi pua, a man ei hawl daw te I hi zawu ahi. A ma hawl lo ah sual henkawh ah tangten le kumtuang thina pumpelna ding in Chanchinpha hi a mamaw tho tho ui. “ Gitlo man chu thina ahin, Pathian thil thawh piak ahi le vang, Jesu Khrista I Lalpau jal ah kumtuang ah hinna ahi (Romte 6: 23).

4. Thagau Thiangtho nasep lo ngal in Jesu a muthei puai.

Mihing te kiang ah Pathian lungthim, thiltup leh thuguk puang dawk tu chu Thagau thiangtho ahi. Lal jesu Khrista

hi kua a hem? Bang zia ah Khawvel a hung a hem? ti te I hetchian ua, I pawm thei na ding un Thagau Thiangtho in I chung ua na a hun sep phawt a ngai hi. Thagau Thiangtho in a pha leh a sia hetkhenthei na, pilna lungthim ei pia (Hebrai 5:14), ti chun Jesu hepina I hedaw thei un, I gingcha thei bep uh ahi (Rom 5:5), Johan 14:26). Thagau thiangtho neilo te chun Jesu a taksang thei puau ah Jesu Khawvel ah a hung na zia le a hethiam zo puau hi. Thagau Thiangtho nasep paw maw ma ma chu ahi le mite kiang ah Pathian kipuanna hiatsak, jesu a hi na diktak taklat, jesu a gingchak thei na ding ua panpi leh a thugen zosia a umzia hetthiam sakte ahi. Paul chun, “ Mihing thute chu mihing lungthim, a sung ah umte ma lo chun mihingte laka hin kuan hezo ding ahi em? Zia gual ma chun, Pathian thute chu Thagau ma ma lo chun, kuama chan a he puau hi,” (1 Korinth 2:11) ti’n a gen hi. Zia chu ahi zia in Thagau Thiangtho nasep panglo ahin chu Jesu Khrista mu chian a haksa, Lal leh hukdam pa ding ah pawm le a haksa ahi.

Thukhakna : Chanchinpha hi kinepna nei talo te â ding ah kinepna ei petu leh mizosia vangam lampi ei kawkmutu ahi gual in khawvel khawsakna lam ah le khanto masawna tuntu pawimaw tak le ahi. A naipen ah gen in, ei thingtang mi nam mawl ma ma te hile Chanchinpha zâl in, pilna leh thiamna I hung nei ua, gam sung leh khawtang ah kivaihawmna phawzaw I hung nei thei uh ahi. Zia zia ah chun, Jesu'n a nungzui te kiang ah thupiak thupi (the great commission) (Mathai 28:19-20) a piak kha sep buting ding chu kochuamte maw puakna ahi. Kochuam hisêl khat chun thagau mangthai ding te khawksak in a vei ding ahi. Chanchinpha he nailote hilna (evangelism) ngaikhaw lo Kochuamte chu a hukdamna lam uh ki etthak ngai ngei in ah. Piangthak diktak chun gam thim ah Chanchinpha puan zak a ngai khaw ngei ding ahi. Kochuam te, mimal tin te leh simtu z osia te Pathian lal gam keklian tute hi zing thei ding in Lalpa’n ei umpi chia tau hen, Amen!

VÂK CHATE GUAL IN UM UN

(Ephesa 5:11-20; Romte 13:11-14)

~ Rev. Ph. Thianneilal
i/c Dongjang Pastor Bial

Ephesa Bu hi Khristian hindanpha kaihuaina thu a hi. Bung 1-3 ah hin Khrista ah i hi'nau a gen ah, Bung 4-6 a hin Pathian chate gual ah um ding thu a gen ah. Bung 5 a hin Paul in Thim leh Vâk khaikhin thu a gen ah, pilvang tak ah um di'n, thiangtho tak leh thagau ah dim ah zia khawvel thim nuai ah um ding in ei hil a hi.

Khawvel mite zosia lak ah hin “Mi ngawl tawh Mipil” khawi zawk hi la nuam em? kiti leh mipil ti chiat hi tiu. A ziktu kihelo (*Unknown*) – *Awise person knows there is something to Be learned from everyone.* Aristotle chun, “Mipil thiltup chu nawpsakna muding a hi pua, maleh natna (*pain*) peldaw a hi zawi,” a ti. Tulai mihingte hi i vak ngaitua le, kikaihuai dân haksa i sak chang a um sek hi. Maleh, mihingte lak a Pathian Thagau a hung tun phat leh kituakna, kithumatna leh kihetthiamna a um sek ah, a nawp ma ma sek a hi.

Job 28 chu i sim leh Chang 20,23,28 chun “Pilna chu khawi tak ah hung kipan a hem? Hetthiamna chule khawitak ah um a hem? Pathian in a lampi leh a umna chu ahia; Lalpa launa chu pilna ahin, thilphalo nutsia chu hetthiamna Bul a hi,” a ti. Paul in, “Khrista chu thilhitheina leh Pathian pilna a hi,” (1Ko 1:30) a tia, Ephesa kochuamte kiang a chun “Pilna chu Pathian Thagau Thiangtho apat eimau lak a hung tung a hi,” a ti kit hi. Tuni i thupiu hi Paul in Ephesa mite kiang a pilvang tak a hing ding ah a chialna thu a hi.

Thim nasep chu sulang in:

Chang 11-14 ah hin thim ah mi hilo in Thim nasepte sulangtu hi in ti a hi. Chang 3-5 ahin thim-a mite umdan a gen a: tatsualnate, Buakna zosia, jamaw thu gente, thumanlo gente, hûknate, du-âmnnate, milim honate (maipha en) tin a gen hi. Gal. 5:19-21 huatna, kinakna, thangsiatna, lungnatna, kilanna, um chuamna, gindan chuamna, enna, tualthana, zûkhamna, kinawptelna tite a hi. Jn 8:44 zuau gen leh zuauthepnate; Rom 13:12-13 zukham, hûk leh kidawicha, kinâ leh kithangsia ti a hi. Dawithil taksan (Dan 18:10-12) leh a lem ah hinkhua mang, sakhua chapona pharisaite gual (Mat 23:27-28), ngaidam theilo (1Jn 2:9-11), thagum suana, diklona (dan Bawsiat) Isai 59:7-9 tite a hi. Zia kigen khalo Bangthil/ Bangthu hitaleh thutak sêlgu, thianthona susia, thumanglo, mi tawh kituaklona (ama pha kisakna nei lian) leh kochuam leh Lalpa nasemte dêkna leh ngaisaklona haw zosia hi Thim nasep a hi. Chang 14

chun ziagual mite chu “Nang ipmu hak in la mithi lak a kipat tho in, Khristan vakna hun pian a,” a lah ti a hi.

Pilvâng tak a um (*walk in wisdom*): Bible kizik lai *Ancient world* a khan mipil kitite kha pre-primary to University tiang grade A hung zote a hi puau hi. Mipil chun a lunggil suangtuana mangcha'n thupukna hawi tak a siam thei hi. Mihing khat chu lekha thiam ma ma maithei himaleh ngawluhai tak a hinkhua mang a um thei a, amau ah chun genphat di a um ngai puai. IQ san sâng in EQ sang chu a pha zawi.

OT leh NT ah mipilte chu Pathian dawigual ah umte ahiu in, a hinkhuau ah Lalpa mêl leh a dawigual nun kilangte ahiu. Mipilte chun dawitelna dik, hun dik leh mun dik in a kitel thei sek ui. Mipil chun kisumtheina mang in pilvang tak in a hinkhua a mang thei sek hi. Mingawl in vang dawitelna phalo a kitel in, a tawpna lam in ama a sukhan, midang a sukha pek in chuleh *society* tiang le a hung

sukha to pek sek ah, tichun, Buaina chi chuam chuam a hung chawkdawk sek hi. Mi hinkhua hi vak ngaitua le chin a dawitena ngei in hinkhua phalo, lunggel phalo a neisak a hi ti he thei ngei in la.

C15-17 *Be careful* (akriBos) *accurately/precisely* pilvang tak in ti hi kaw! ah lampi neucha chawtkhial leh kiatthak ah thitheina gual genna a hi.

Redeem the time (exagorazo) *to buy it Back*, Pathian lopina ding a hun mang tina a hi. Hun paisa khatveikimangchumatkitthei tâklo a hi. Hun a phat taklo zia in ti chu *World system* hi Pathian dawigual dona a hi tai tina a hi. *Understand God's will* Pathian lunglam het a pawimaw hi. A zia chu gitlo kisik ngailo ah lamdik in ei pui sek hi. La dawigual lei ah mi'n le hui hen, tia thil Bangkim ah ama dawngte, a thu zawmte, thudik, lungthim thiangtho, hinkhua thiang, hepina leh lainatna hau, ngaidamna, kingaitawmna, Lalpa ngak ham ham, ziltina ngainat

(Pv 15:22) leh thumatna tite hi Pathian lunglam chu a hi. Abraham ginna, David Pathian ah kingakna, Paul Thagau kaihuaina, Jesu Pa â ding ah a kipiakdawnate gual hi Pathian lunglam chu a hi.

Thagau ah dim Chang 18-21: Zukham ah um leh Thagau ah um ti hi kibanglo tak a hi. Zukham ah um chu pawlam thil kaihuaina (*control*) nuai ah um tina ahia; Thagau ah um chu Thagau Thiangtho kaihuaina nuai ah um tina a hi. Zukham ah umte chun kinialna, tatsualna, thagumsuana, lungthim siatna, kinakna, kipawngBawlina leh khawtang ah phalo chi chuam chuamte a hingdawk sek hi.

Thagau ah dimte teptena chu Paul in pali a gen hi.

1. Joyful worship Pakna lâte, Pathian lâte, thagau lam Late ah kihotua chiat in, Lalpa kiang ah la lunggil zosiau in thilgi kilawm leh La sa un

2. Thangks giving Kipak zing hi Pathian gingte/chate lungthim put a hi. I mihing

chanpite kiang ah kipak hi
Lalpa kiang ah kipak tina
le a hi. I mihing chanpite
chungalungnate chu Lalpa
kiangin le kipak tak tak
theilo ahiu.

3. *Harmony and Fellowship*

Khrista launa ziaak ah
khat leh khat kilutchatua
chiat a, kituak tak a
kipawlkhawmna

4. *Thianthona* *leh*

thilhitheina Gitlona zotu
hinkhua mang inla. *Glove*
hin ama in bangma a
hithei pua, maleh khut a
kithun phat leh khut in a
bawlthei thei chu a bawl
thei mai sek hi. Ziagual ah
chun Thagau Thiangtho
ah dimte chun Pathian
thilhitheina leh lungsiatna
chu a nei sek ui.

Thutawpna: Vâk gual in Hing
hi tiu. Paul in Ephesa 5:11-21
ah hin gingtute zosia ei ko hi.
Bang Bawl ding ah?

1. **I gitlona** **Vâk ah sang
ding ah** - thianthona leh
thutak in.

2. **Pilvang tak ah um ding ah**
- hun zosia hi kumtuang
tingthei Bawl na lemchang
ah siam di.

3. **Thagau ah dim ding ah** -
lim zing, kipakna chang
hiat leh kingainiam tak ah
kilutchatua ah um ding a,
Paul in gingtute zosia ei ko
a hi.

Chuti a hi ziaak in, “Nang
ipmu hak in lah, mithi lak ah
kipat hung tho ta’n, chutileh,
Khrista chun vakna hun pia’n
a.” Lalpan a thu ei malsawm
piak ta hen. Amen.

HUN MAT DIK

Tun vaigei hi LOPINA a hi pua, mani kisuk mualpho bâk in
midangte zalona etsaktu a hi.

A hung vaigeite ngâk hin HUNTEP ngai pawimawte gawt
tina a hia, vaigeite khawksak pi zaw tina a hi.

NUMEITE LEH PATHIAN NASEPNA

(Genesis. 2:18,22-23;29:14)

~ *Pi Tingthiannei*
Salem Veng

Mihing siam masakpen chu Adam a hi, Pathian in pawsal Lama panpi ding in a kithuapi ding ah kilawm siampiak ing ka a tia, Lalpa Pathian in pawsal chu tui tak in a i-mutsak ah a i-mut kal in a nakgu lak ah pakhat a ladawk hi, Lalpa Pathian in pawsal ah kipat a lakdaw nakgu chu Numei in a siam ah, Adam in zia zet hi chu ka gu apat gu nei ah siam ka taksa a kipat taksa nei ah siam pawsal nakgu apat lakdaw ahi zia in Numei ti di a hi a ti.

Hebraite chun ka gu gual ah gu nei a, ka taksa gual taksa nei ti'n a gen sek u'i. Zia hi ei un ka thisan kizawppi i ti sek uh tawh kibang a hi. A kikiaknau chu numei leh pawsal a hinau a hi mai hi. Chungnung zaw leh nuainung zaw um diaklo a hi ti a taklang ah, chuti a hi zinglai in gancha lak ah vang danglam bik a hi zia uh a taklang ngen hi.

Pathian in a mihing siam ama mai ah lunghel tak leh kimlo chu, a gu gual gu nei ah, a taksa gual taksa nei, lam zosia panpitu leh kawppi hi ting ding ah numei siam a hi hin a mamaw chu amu ta a hi (Thuthlung hlui

hrilhfiahna).

Mathew Henry chun, "Numei hi Adam luchang apat siam hi pua a chung a thunei ding a siam hilo, chun, a tawden ding ah a kêng lak apat siam le hilo, ama panpitu di leh pangkhawmpi ding ah a pang (side) apat siam, a venbit ding ah a bân nuai apat siam ahin, hepi leh lainat ding in a lungchang kiang nai apat siam a hi,"a tia. Zia hi hilchiandan dikpen ahilo in le ngaitua khamtak hi'na.

Rev. Dr. Kim vaiphei in Pathian chu ei panpitu ahin, Numei le pawsalte panpitu ahileh numeite le ki niam diaklo a hi a ti.

Zia hin a gen ut pêntak chu Pathian lalgam kek lian ding ah chun numei hi pawсал sang ah semtawm zaw di leh kimang tawm zaw di ah siam a hi puau ti a taklang hi.

Numei Pathian nasepna kimang thupi ma ma Bible pawlam ah te vak en hi tiu:

1. Mother Teresa: Migenthei tamtak tungdingtu, Thagau mangthai tamtak Pathian nasem ding mi siamdawktu a hi. Khawvel huap ah kimang a hi.

2. Pi T. Hawiphal: Pathian lalgam kekliantu thupi tak khat a hi. India gam bep hilo gam chuam chuam ah Pathian lalgam kêkliantu suan um tak a hi.

3. Billy Graham zi Ruth Graham: A pawсал khawvel huap ah thugentu minthang, thagau mangthai tamtak Lalpa kiang ah puiluttu khan a zi'n a zathuap hawidan a gen hi.

Numei Pathian nasepna kimang Bible sung ah kipat muthei khenkhatte:

1. Mari leh Martha: Lalpa Jesu a In un a tuntheina ding ah a lah lawpdanteu (Luka.10:38-

40) a kimuthei hi.

2. Samari numei nu khan Samari khua mite chu Jesu kiang in a pui ah, amau in le Jesu a mu phat un a gingcha tau hi (Johana.4:28-40).

3. Numei khat Ludia kiti Thuatira khawpi puan sandup zuak sek chun, Lalpa a hun ging phat in Sawlchak paul leh ah lawite chu a In ah tung di'n a chial ngut ngut hi (Nasepte.16:14,15). Pathian nasemte a In ah tunsak ding a kithalawp ma ma hi.

4. Tabitha Greek pau ah Dorka hi thilpha bawl leh thilpiak pha dim a hi. Meithai te a ding ah puanak leh puante haw a bawlpiak sek hi (Nasepte.9:36,39). Sepdan chuam chuam in Pathian nâ septhei a hi ti a taklang hi.

5. Shallum Zi Jawlnei nu Huldah kiang in Judai gam ah Leng Josiah'n mi a sawl ah Juda mite'n Pathian lampi nusia ah Pathian dante a ho ziaak un a chung ua thilphalo tungding thu a puangzak hi (2Lengte.23:14,17). Leng Josiah Pathian kiang ah a kikawiniam ziaak in thilphalo Juda mite chung ah tung di chu nang chung in tung pua'n

- ah t'in a gen piak hi. Numeite hinle i kiang vel ah thilphalo bawlte hi Lalpa kiang ah pui hi i mawpuaknau a hi.
6. Zeraphat ah Methai nu'n Pathian mi Elijah nek di vaithum a bawlpiak ziak in kial hunsung ah vaithum a tamsam puai (1Lengte.17:11-16).
7. Shunam numei nu'n Pathian mi Elisha chawIngakna di a In pindan bawlpiak ding in a pawsal a phût ah, a bawl zaw phat un Pathian mi chu a pindan bawlpiaknau ah chun a um pet in Numei nu chabei nu chu cha hun nei ding a hi dân a gen piak hi (2Lengte.4:10,11-17).
8. Israel mi ngaklak khat in Naman phak sukdam a hitheina ding in lampi a kawkmu hi. A pu â ding ah damna tuntu a hia, Naman in Pathian a chawihawi khawlaw tai (2Lengte 5: 4,5).

India gam bep hilo gam chuam chuam ah Numei vaihawmtu a pangthei a hi chun, Pathian gam kekletna ding ah Numeite hi le malatu panthei a hia, nasa tak in Pathian lalgam a ding in sem hi tiu. Nu te'n La chate uh Lalpa Jesu nungzuitu

hawitak ah a lah siamdaw uh leh i chennau khawvel sunuamtu hi'ntin, Pathian hiatna lam ah la puihuailo uh leh i chennau khawvel suhaksatu'n le pangthei ahiu.

Lalpa Jesu khawvel ah a lenlai in nungzui numei bangzat hem a nei ah, Jesu than ah chia masapente kha le numeite ahiu. Mari Makdalin kiang ah Jesu a kilak ah, Mari'n a nungzuite kiang in Jesu thina pat a thawkit thu a va tangkopi hi.

Pastor zi, Kochuam Upa zi, leh Evangelist zi te'n a pawsalte un a sepnau ah ga tamtak a sua theina ding un panmun pawimawtak a lua ui.

Numeite Pathian nasepna ah Missionary kuandawk theite kuan in tin, kuandawk theilote Inmun ah pauchapnate a pang thei ah, chate Pathian nasemtu hithei ding in kaihuai thei hi.

Nungakte le i nute Insung nasepna panpitu hawitak hi gua hitiu. Chuleh, In mun ah sum mutheina di puan gâte, puankhuite leh a dang dang a mu thei a hi. I sum muteu Pathian gam nasepna ah phachuam tak ah mang ding in pan la hitiu. Lalpa'n a thu malsawm ta hen.

THE 46th PCI BIENNIAL GENERAL ASSEMBLY REPORT

PCI General Assembly 46 veina chu Phudmuri Presbyterian Church KJP Synod Sepngi in 28th April – 3rd May, 2026 sung a zin tun hi. Tuchung PCI General assembly hi Kochuam mal (Phudmuri Presbyterian Kochuam) in a zin tun a hi. General Assembly thupi chu: “Pathian kiang ah chun lopina kumtuang in um ta hen,” (Php 4:20). ti a hi.

Tangphai Presbyterian Church Provisional Synod ah kipat in Delegate 29 leh Synod Choir ava ki pang thei hi. Ni 28 April, 2026 in Lamka ka nusiau a, Ni 5 May, 2026 ni in dam tak in Kochuamte pauchap na zâl in Assembly sung leh khualzinna lampi ah le haksatna leh buaina tuaklo in ka hung tung kit tau hi.

Tuchung The 26th PCI Biennial General Assembly hi ei uh Tangphai Presbyterian Church Provisional Synod a ding ah tepte tak tak thil het mil taklo ding chu Provisional Synod ah kipat full- fledged status ah lan kê i hui hi (Gen XII:12; Ref. EC ResIn No. XIV.I. Dt. 14th-15th Jan,2026). Pathian in lampi chuam chuam ei zui sak a; vaigei ngailo Pathian in a hun tai a ti phat in bangmachan a dodal theilo ding in Pathian in a hun tak in na a sem tai Pathian lopina i piau hi.

Synod piting ah lankêi hun ding chu PCI Executive Committee in hun leh ni ding hun guat in tin zia programme chu i matzaw phat ua leh vang Tangphai Presbyterian Church Provisional Synod kiti sek kha Tangphai Synod ti hung hi tai tiu.

TANGPHAI SYNOD CHOIR ORIENTAION PROGRAMME

Ni 14 May 2026 (*Ningani*) | 7:00 p.m.

- Puitu - Rev. Siamlalron, *Leader*
 - Memberte suklatna - T.Upa Thangginlun,
General Secretary
 - Fuina thu leh - Rev. S. Lama Vaiphei, *Moderator*
pauchap piakna
 - Thuchawm genna - i) Rev. Kamkhotinthang Neihstial,
Executive Secretary
ii) Rev. C. Lalremruata,
Consultant
iii) Tv. Malsawm Vaiphei,
Convenor
 - Hun khâkna - Rev. Summinlian Vaiphei,
Synod Secretary (Sr.)
-